



MIŠLJENJE

**po Zahtjevu privrednog subjekta ArcelorMittal Zenica d.o.o., Bosna i
Hercegovina**

**Sarajevo
april, 2025. godine**



Broj: 07-26-7-005-3/25
Sarajevo, 24.04.2025. godine

Konkurencijsko vijeće Bosne i Hercegovine, na osnovu člana 25. stav (1) tačka f) Zakona o konkurenciji ("Službeni glasnik BiH" 48/05, 76/07 i 80/09), a po Zahtjevu privrednog subjekta ArcelorMittal Zenica, d.o.o. Bulevar Kralja Tvrtka I br.17 72000 Zenica, zaprimljenom od strane Konkurencijskog vijeća dana 27.02.2025. godine, pod brojem 07-26-7-005-1/25, Konkurencijsko vijeće, na 26. (dvadesetšestoj) sjednici održanoj dana 24.04. 2025. godine, je donijelo

MIŠLJENJE

Konkurencijsko vijeće Bosne i Hercegovine (u daljem tekstu: Konkurencijsko vijeće) je dana 27.02.2025. godine zaprimilo pod brojem: 07-26-7-005-1/25 Zahtjev za izdavanje mišljenja (u daljem tekstu: Zahtjev) podnosioca privrednog subjekta ArcelorMittal Zenica, d.o.o. Bulevar Kralja Tvrtka I br.17 72000 Zenica (u daljem tekstu: ArcelorMittal Zenica).

U dostavljenom zahtjevu se navodi kako je Konkurencijsko vijeće Bosne i Hercegovine dana 04.04.2018. godine donijelo Rješenje o ocjeni koncentracije broj: UP-02-26-1-004-12/18.

Shodno navedenom rješenju ocjenjena je dopuštenom koncentracija po zajedničkoj prijavi namjere koncentracije podnesenoj od strane privrednih subjekata ArcelorMittal Zenica d.o.o., Grad Zenica, KPA Unicon Oy i Finnish Found for Industrial Cooperation koja se odnosi na osnivanje društva zajedničkog ulaganja, a nastaje na relevantnom tržištu proizvodnje, distribucije i trgovine električnom energijom na cijelom tržištu Bosne i Hercegovine, te tržištu proizvodnje i snabdijevanja toplotnom energijom na području Grada Zenica u Federaciji Bosne i Hercegovine.

Imajući u vidu da je koncentracija ocjenjena dopuštenom, u skladu sa zakonskom procedurom dana 19.01.2019. godine u Sudskom registru Općinskog suda u Zenici registrovano je društvo Toplana Zenica d.o.o. sa sljedećom vlasničkom strukturom:

Osnivač	Udio u osnivačkom kapitalu	Procenat osnivačkog kapitala i glasova
ArcelorMittal Zenica d.o.o.	11.734.980,00 KM	50 %
Finnish Found for Industrial Cooperation	3.520.494,00 KM	15 %
Grad Zenica	4.693.992,00 KM	20 %
KPA Unicon Oy	3.520.494,00 KM	15 %

U zahtjevu se napominje da je shodno osnivačkim dokumentima definisano da postoji zajednička kontrola svih osnivača :

- Odluke skupštine donose se većinom od 85% od ukupnog broja glasova
- Nadzorni odbor sastoji se od pet članova pri čemu svaki član ima jedno pravo glasa. Kvorum sjednice čine četiri člana Nadzornog odbora, uključujući najmanje jednog člana Nadzornog odbora kojeg imenuje svaki od Osnivača, a odluke se donose većinom od četiri glasa „za“

U maju 2023. godine nad osnivačem KPA Unicon Oy pokrenut je stečajni postupak, čime isti izvjesno prestaje postojati. Slijedom toga, KPA Unicon Oy je putem stečajnog upravnika ponudio svoj udjel u društvu jednom od osnivača tj. ArcelorMittal Zenica d.o.o., te je postignut načelni dogovor o kupoprodaji udjela (u daljem tekstu: Transakcija).

Shodno navedenoj Transakciji ArcelorMittal Zenica d.o.o. bi kupio udio nominalne vrijednosti 3.520.494,00 KM od KPA Unicon Oy, što predstavlja 15% udjela u osnivačkom kapitalu i glasova u društvu Toplana Zenica.

Po završetku Transakcije privredno društvo Toplana Zenica bi imalo sljedeću vlasničku strukturu:

Osnivač	Udio u osnivačkom kapitalu	Procenat osnivačkog kapitala i glasova
ArcelorMittal Zenica d.o.o.	15.255.474,00 KM	65 %
Finnish Found for Industrial Cooperation	3.520.494,00 KM	15 %
Grad Zenica	4.693.992,00 KM	20 %

U zahtjevu se napominje da bez obzira na povećanje udjela ArcelorMittal Zenica d.o.o. u privrednom društvu Toplana Zenica neće doći do promjene kontrole, odnosno i dalje postoji društvo zajedničkog ulaganja sa zajedničkom kontrolom i odluke će se donositi većinom od 85% od ukupnog broja glasova u Društvu.

U dopunu Zahtjeva koju je Konkurencijsko vijeće zaprimilo dana 27.03.2025. godine posebno se ističe da osnivači ne mogu mijenjati prirodu poslovnog subjekta, preusmjeravati klijente ili prihod Društva Osnivačima, s njima povezanim društvima ili drugim povezanim stranama osim ako je drugačije dogovoreno jednoglasno (član 28. Statuta).

Nadalje, članom 29. Statuta definisano je da se odluke Skupštine usvajaju 85 % većinom broja glasača prisutnih na sjednici, osim o pitanjima navedenim pod tačkama i. do xvii iz člana 28. za koje je neophodna jednoglasna odluka svih Osnivača. S tim u vezi napominjemo da je članom 28. propisano da je jednoglasna odluka svih Osnivača neophodna kada se odlučuje o sljedećim pitanjima:

- dobrovoljna likvidacija Društva, spajanje ili konsolidacija
- promjena Poslovne aktivnosti Društva

- iii) promjena pravnog oblika
- iv) promjena statusa Društva
- v) izdavanje ili saglasnost za izdavanje vrijednosnih papira ili uzimanje konvertibilnih kredita, opcijskih kredita ili opcijskih prava
- vi) povećanje ili smanjenje osnovnog kapitala Društva ili bilo koje drugo pitanje koje utječe na iznos osnovnog kapitala ili ovlaštenje Nadzornog odbora da vrši takve transakcije
- vii) otkup, sticanje ili prijenos udjela od strane Društva, te ovlaštenje Upravnog odbora da vrši otkup, sticanje ili prijenos udjela Društva
- viii) prodaja, prijenos ili druga raspolaganja bilo kojim poslovnim sredstvom koje je dio Poslovne aktivnosti čija vrijednost prelazi 33 % knjigovodstvene vrijednosti imovine Društva prema balansu stanja na kraju prethodne godine
- ix) imenovanje ili razrješenje eksternih revizora Društva
- x) preuzimanje bilo kupovinom ili na drugi način, od strane Društva bilo koje poslovne aktivnosti ili dijela, opcija, hartija od vrijednosti drugog društva, ili osnivanje podružnice
- xi) svako nuđenje ili dodjela bilo kakvih nadređenih prava bilo kojem Osnivaču bez pružanja materijalno srodnih prava preostalim Osnivačima
- xii) sklapanje partnerstva, zajedničkog poduhvata ili sporazuma o formiranju konzorcija
- xiii) sklapanje ugovora i aranžmana Izvan uobičajenog toka poslovanja, ili koji nisu u skladu sa redovnim komercijalnim uslovima ili načelom „van dohvata ruke“ kada njihova vrijednost kao pojedinačne transakcije ili zbirno kao niza transakcija u toku jedne finansijske godine premašuje vrijednosti od 200.000 EUR
- xiv) zaključenje, produženje ili izmjena i dopuna bilo kojeg sporazuma, davanje zajmova ili pružanje garancije ili kolaterala bilo koje vrste u ime bilo koje treće strane ili uključivanje u bilo koji finansijski aranžman koji nije predviđen budžetom, te odricanje od bilo kakvog prava ili raskid bilo kojeg ugovora
- xv) **izmjene Osnivačkog akta i Statuta o (i) većini za donošenje odluka u unutrašnjim tijelima Društva (ii) postupku povećanja kapitala Društva (iii) ograničenju prijenosa udjela (iv) otkupu udjela (v) isplatama Osnivačima**
- xvi) dodatne isplate Osnivačima i povrat te isplate
- xvii) bilo koja pitanja ili aktivnosti koja bi utjecala na raspolaganje imovinom velike vrijednosti Društva (raspolaganje imovinom velike vrijednosti predstavlja svaku obavezu koja prelazi 33 % knjigovodstvene vrijednosti imovine Društva prema iskazanom u posljednjem godišnjem bilansu stanja) od strane Društva.

Shodno članu 36. i 37. Statuta definisano je da Nadzorni odbor ima pet članova gdje ArcelorMittal Zenica, d.o.o, ima pravo nominirati dva člana, a KPA Unicon, FinnFund i Grad Zenica imaju pravo nominirati po jednog člana Nadzornog odbora.

Kvorum sjednice Nadzornog odbora čine četiri člana, uključujući najmanje po jednog člana Nadzornog odbora imenovanog od strane svakog od Osnivača, a odluke Nadzornog odbora se donose većinom od četiri glasa „za“ od članova Nadzornog odbora osim kada se odlučuje o pitanjima definisanim članom 43, Statuta kada se

odluka donosi jednoglasno. I to:

- (i) imenovanje, razrješenje i suspendiranje Uprave Društva
- (ii) usvajanje svakog budžeta, Plana poslovanja i izmjena i dopuna Općeg plana poštovanja Društva i svih njihovih izmjena i dopuna
- (iii) izmjena datuma bilansa stanja i računovodstvenih principa ili standarda Društva
- (iv) pokretanje sudskog postupka, arbitraže i drugog postupka, odnosno pristupanje Društva takvih pokrenutim postupcima pred sudom, arbitražom ili u drugoj vrsti postupka, ako je vrijednost predmeta koji je predmet spora ili slučaja veća od jednokratnog iznosa od 100.000 KM. Ukoliko bi takvo pokretanje i pristupanje već pokrenutim postupcima koji su u najboljem interesu Društva bilo vezano za rok unutar kojeg nije moguće dobiti odobrenje Nadzornog odbora, Uprava Društva može poduzeti tu radnju uz obavezu da odmah traži odobrenje Nadzornog odbora
- (v) zaključenje, izmjena i dopuna ili raskid materijalnih ugovora bilo koje vrste, uključujući ali se ne ograničavajući i na sve vrste sporazuma vezanih za Poslovnu aktivnost, a koji se odnose na period duži od 12 mjeseci uz otkazni rok duži od 12 mjeseci i/ili imaju vrijednost višu od 500.000 EUR i do 33 % knjigovodstvene vrijednosti imovine Društva prikazane u bilansu stanja na kraju prethodne godine, Ukoliko je potrebno donijeti odluku za vrijednost iznad 500.000 EUR i 33 % knjigovodstvene vrijednosti, odluku donosi Skupština
- (vi) sklapanje ugovora i aranžmana izvan uobičajenog toka poslovanja ili koji nisu u skladu sa redovnim komercijalnim uslovima ili načelom „van dohvata ruke“, kada njihova vrijednost ne premašuje vrijednost Materijalnog ulaganja
- (vii) svako materijalno odstupanje od usvojenih Planova poslovanja Društva
- (viii). naknade za članove Uprave
- (ix) utvrđivanje obima ovlaštenja Članova Uprave Društva
- (x) poziv za osnovni kapital u skladu sa članom 4.6.4 Ugovora osnivača

Na osnovu svega navedenog Podnositelj zahtjeva od Konkurencijskog vijeća traži mišljenje je li društvo ArcelorMittal Zenica obavezno podnijeti prijavu koncentracije u predmetnoj Transakciji.

Postupajući po podnesenom Zahtjevu, analizom svih dostavljenih podataka i činjenica iz Zahtjeva, kao i dopune Zahtjeva, a na osnovu Zakona o konkurenciji, Konkurencijsko vijeće je mišljenja kako navedena poslovna transakcija *ne predstavlja koncentraciju* kako je opisno u članu 12. stav (1) tačka b) pod (1) Zakona o konkurenciji, budući da gore opisanom transakcijom neće doći do sticanja pojedinačne kontrole od strane privrednog subjekta ArcelorMittal Zenica nad Toplanom Zenica, te bez obzira na povećanje udjela u osnivačkom kapitalu i broja glasova u društvu, ArcelorMittal Zenica neće imati kontrolu ili prevladavajući uticaj u privrednom društvu Toplana Zenica, odnosno i dalje će postojati zajednička kontrola svih osnivača.

S obzirom na sve navedeno Konkurencijsko vijeće je **mišljenja** da navedena poslovna transakcija ne podliježe obavezi prijave koncentracije, odnosno privredni subjekt

ArcelorMittal Zenica nije u obavezi podnijeti prijavu koncentracije u skladu sa Zakonom o konkurenciji.

Ovo mišljenje je dato isključivo na osnovu podataka navedenih u Zahtjevu i izdaje se na osnovu Zakona o konkurenciji, te ukoliko dati podaci odstupaju od stvarnog i činjeničnog stanja ovo mišljenje se ne može primijeniti.

Predsjednik

Ivo Jerkić

Dostaviti:

- Naslovu,
- U spis.